

# Met dem Klein om Weihnachtsmaat

Reinhold Steinborn

Em verjängene Jahr, kuez vür Weihnachte, sen ich met dem Klein - mengem Enkelche - no Ahrweiler op de Weihnachtsmaat jefahre. Et wor en Samstagmedach, de Sonn strahlte wunderbar vom Himmel, äver de Wend wor eisich kalt. Mir han os deck warm aanjepöngelt on sen dann langsam an de Bahnhoff jelaufe. On do jing dat Spill schon loss. Ohne Abitur stonn ich vür dem komplizierte Fahrkaateautomat, han sämtliche Knöpp of der „Jlascheif“ betatsch bis alles verschmiert wor on Jeld eren jeschmesse, äver en Fahrkaaat kom net erous. Nevenaam stonnten e paar Fente; die han jelaach üve meng Schusseligkeit on mir en menge Verzweiflung jeholfe. Einer von denne fröch mich: „Kann ich helfen?“ On er hät mir jeholfe! Er tatsch mol he on tatsch mol do on die Kaate flochten en dä Ausjabeschacht. Jetz konnt der Zoch kun. Der Kaste wor also net kapott, äver ich hatt' nur kein Ahnung von der moderne Bahn.

En Ahrweiler anjekunn sen mir dann direk durch die jroße Stadtmoerepooz, erav zom Maat. Dann hoorte mir och schon vun weidem Weihnachtsleede, die e paar Tröötämänner spille däten. Mir komen nöher on konnten dann dat ganze Spektakel sehn. Himmel on Mensche woren do. Mir han os an de Hand jepack, sen durch dat Jewöhl, bes me vür dem riesige Christbaum stonnten. Sujet hatt' der Klein noch net jesehn. Die Äujelche woren am lüchte, die Bäckelche ruut vor Obräjung. An dem Baum däten dousend Lichter bletze, bonte Kurrele hingen dran, riesije Päckche on Tannezappe däten draan baumele. Vor lauter Krämpel konnt me keine Baum mie sehn.

Mir sen dann langsam üve dä Maat en Richtung Kirch jeschobe woore, vorbei an lauter Bude met Söbigkeit. Do han ich dann dem Klein e Lebkochehäz met Zuckerjussaufschrift „Frohe Weihnachten“ jekauf. Ich han mir och jet zum Schnäuse jējōnnt on me newenaan en Jlühweng erennjzoge. E bissje weide jof et Reifkoche met

Appelschmeer. Ein Portion für mich on Fritte met Majo für dä Klein. Vorbei an der ganze Kirmesbude, Richtung Ahrstross kom oos op einmol der hilleje Mann entjejen - en ehrwürdige, jrusse Mann met Mantel, Bischofshot und Bischofstab. En de Händ e deck Booch on om Buckel en decke Sack met Sössigkeit. Jetz kroch der Klein äver Schess. Do han ich en opjeklät: „Dat es der hellije Nikolaus, en joodde Mann. Dat wor de erste Türk, der no Europa kom. Der hätt' de arm Löck jeholfe, on de klein Kende beschenk.“

Hück ze Dach kennt me doch nur noch Weihnachtsmänner met en ruude Mötz on en ruude Bademantel, die an de Dachkalle erömkrabbelen odder für en Supermaat Reklame laufen.

Der helleje Nikolaus joof dem Klein e Händche on wor en dem Jewöhl verschwunde.

Bei dem Klein moot sich do jet anjesammelt han. Der zoch mich am Ärm on reef: „Opa, ich moß emol!“ Ich han dem Klein jesaat: „Waart noch e bische, gleich sen me an de Ahrpoortz, do kanns de en de „Öffentliche“ Pippi maache.“ Äver der sprong von dem eine op dat andere Beinche on reef: „Opa, ich kann ever jetz net mieh.“ „Dann stell dich henech dat Frittebüdche, ich bleeiven he stonn on passen op“, wor ming Antwort op die Nuut von dem Klein. Et dat e bische douere; denn er kroch met der kaale Fengerche die Botz net op, on dat Lebkochehäz moß jet deef jehange han.

Ich huurt en plötzlich knatsche: „Opa, dat schöne Häz es ganz naaß.“ Do han ech demm jesaat: „Dat mäht nix. An de nächste Kamellebud kauf ich dir e nöü Häz.“ Bei der Jelejenheit han ich mir noch en Jlühweng jējōnnt. Jlöcklich, äver kapott, sen me dann met dem nächste Zoch heim jefahre - et wor en richtig schöne Daach op dem Weihnachtsmaat en Ahrweiler.

Im Zuch fröch mech der Klein: „Opa, wat machen mir dann jetz met dem weiche Lebkochehäz?“ „Weisste wat, leeve Jong, dat Häz nemme met Heim on jenn ett de Oma, die deit suwiesu alles zoppe.“